

dicke dijns hillighen lichames en bloe-
des en heueste sie wedergheset toe die ee-
wighe salich^t **D**och dy moeten benedien
die hemelen en alle loff en vroude der
hemelen wanttu huden gheopent he-
ueste mijnre onsaligher sielen die hemele
dijnre wonden **E**n heueste sie inghelept
in dy die daer biste dat waerachtighe
paradijs der ewigher blyschap en salic-
heit **D**at eertrijcke en die vulh^t der eer-
den sal dy benedien want du my hu-
den ghemaket heuest van enen mesche
een enghel. vander eerden een hemel
Waerlich du biste allene weerdich in
macht toe hebn ouer my crme snoede
sundersche. en mijnre toe ontfermen.
wanttu my myt dijn durbaer bloet
verloest heueste **D**at meer en al dat
daer in is moet dy benedien voer my
wanttu my deelachtich heueste ghema-
ket al dijne gracen ende gueden soe
dattu my niet en wilste noch in mach-